

宋诗纪事

四



〔清〕厲鶚
輯撰

宋诗纪事

〔清〕厲鶚 輯撰

四



宋詩紀事卷七十五

錢唐 吳
厲鶚 毛德基
輯定 勘

文及翁

及翁字時學，號本心，綿州人。登進士第，歷官參知政事。

和賈魏公大雪遺潛安撫侍郎

身遊廊廟意山林，六出花開一片心。平地尺書叨載史，瞻天班賀齒諸任。屢豐歲事嘗如昔，太素風光直到今。收斂神功放晴景，白河半夜掃層陰。咸淳臨安志

山中夜坐

悠悠天地間，草木獻奇怪。投老一蒲團，山中大自在。天地間集

陳存

存，咸淳中官侍郎。

和太師平章魏國賈公大雪遺潛侍郎之作

先臘催開萬玉林，人心悅處即天心。山河洞徹重曠遠，宮闕高寒一柱任。瑞應嵯峨知有日，塵清洄曲在斯今。神功變化無留迹，便放陽春捲積陰。咸淳臨安志

曹元發

元發，咸淳間官侍郎。

和太師平章魏國賈公大雪遺潛侍郎

乾坤滿眼盡琪林，擎玉詩傳魏國心。寫琰已增天府重，掌冰匪媿地官任。三千界內清無際，數十年來瑞獨今。喜雪未幾還喜雨，老農歌舞愛春陰。咸淳臨安志

曹 遼

遼字擇可，號松山。御前應制，又爲賈師憲之客。

寄豫章詩社諸君子

向來心事劍能知，曾結仙人汗漫期。南浦看花春載酒，西園刻燭夜吟詩。淒涼風月隨殘夢，零落江湖似斷棋。千里洪崖秋水隔，暮雲無處說相思。詩林萬選

南徐懷古呈吳履齋

匹馬來逢塞草秋，淮雲一片隔神州。黃昏燈火西津渡，白晝風烟北固樓。猶有斷碑知晉宋，誰將遺石問孫劉。天荒地老英雄盡，落日長江萬古愁。詩家鼎鑪

何夢桂

夢桂字巖叟，初名應祈，字申甫，嚴之淳安人。咸淳乙丑，廷對第三人。授台州軍事判官，歷

仕至大理寺大卿，引疾去。至元累徵不起，築室小西源。有潛齋集。

擬古

杞國天柱傾，哀我鞠子疚。蒼鵝飛沖天，妖星大如斗。簾下玉牀移，山摧失鼇負。河南弔遺黎，原野骨未朽。北邙望孤陵，古木叫猿狖。朔風吹塵沙，天寒薄翠袖。南雲山萬重，去去莫回首。

寄王南叟

歌盡驪駒落日寒，相思無處問平安。客愁白髮三千丈，世路青泥百八盤。夜月梅花頻入夢，秋風菰米強加餐。高山如故絲弦在，嬾向旁人取次彈。

哭橋陵

百年弓劍入橋陵，豈料三泉化劫塵。空有魚燈照荒土，忍將玉軸問遺民。蒼梧日落啼丹雀，金粟雲深臥石麟。寒食家家上丘冢，六宗孟飯屬何人。

弔維揚瓊花

雙鶴揚州問故家，一樽后土弔瓊花。人間驚破霓裳舞，天上徵回玉女車。死藥記曾霑雨露，落英誓不污泥沙。後庭玉樹今誰主，猶得臺城葬麗華。

己卯春過西湖和諸公

白髮星星紗帽烏，怕隨年少過西湖。清明上冢行人少，寒食開門宮使無。半世行藏隨杖屨，百年悲樂寄樽壺。歸來第五橋邊路，半樹殘陽噪畢逋。

題川無竭寄傲窗

南山有路滑如苔，多少人從半嶺回。不是老僧空傲世，世人自不上山來。以上潛齋集

贈留中齋歸

昆明灰劫化塵縈，夢覺功名黍一炊。鍾子未甘南操改，庾公空作北朝悲。歸來眼底吳山在，別後心期浙水知。白髮門生羞未死，青衫留得裏遺尸。

庶齋老學叢談：何探花夢桂，留中齋知舉日及第。留歸，贈詩云云。按留夢炎，宋大魁，降元。

黃公紹

公紹字直翁，邵武人。咸淳元年進士，隱居樵溪。有在軒集。

競渡櫂歌

望湖天，望湖天，綠楊深處鼓鼙驚。好是年年三二月，湖邊日日看划船。
鬪輕橈，鬪輕橈，雪中花卷櫂聲搖。天與玻璃三萬頃，儘教看得幾吳舸。
櫂如飛，櫂如飛，水中萬鼓起潛螭。最是玉蓮堂上好，躍來奪錦看吳兒。
建雲旂，建雲旂，土風到處總相猶。朝了霍山朝岳帝，十分打扮是杭州。
蹋青青，蹋青青，西泠橋畔草連汀。撲得龍船兒一對，畫欄倚徧看遊人。在軒集

夢梁錄：二月初八日，錢塘門外霍山路有神曰祠山真君誕聖之辰。其日，龍舟六隻，戲于湖中。其舟俱裝十太尉、七聖、二郎神、神鬼、快行、錦體浪子、黃胖，雜以鮮色旗傘、花籃、鬧竿、鼓吹之類。其餘皆簪大花、捲腳帽子、紅綠

戲衫，執棹行舟。帥守出城，往一堂彈壓。令立標竿于湖中，挂錦綵、銀旛、官楮。有一小節級，披黃衫，頂青巾，戴大花，插孔雀尾，乘小舟抵湖堂，橫節杖，聲喏，取指揮，以舟回，朝諸龍舟，小綵旗招之，俱鳴鑼擊鼓，分兩勢划棹旋轉，遠列成行，再以旗招之，龍舟並進者二，又以旗招之，其龍舟遠列成行，而先進者得捷取標賞，聲喏而退，餘者以錢酒支犒也。

史蒙卿

蒙卿字景正，鄞人，司封郎中彌鞏之孫。咸淳元年進士。江陰軍教授。宋亡不仕，自號靜清處士。

感事

宮花攢曉日，仙鶴下雲端。自是傷心極，那能著眼看。風沙兩宮恨，烟草八陵寒。一掬孤臣淚，秋霖對不乾。

有感

途窮那免哭，哭罷一高歌。白日催年急，青山閱世多。浮生從潦倒，遺恨不消磨。何許南來雁，殷勤掠暝過。以上吳禮部詩話

史唐卿

唐卿，與兄蒙卿同登咸淳元年進士。

鳳鳴洞

何年雷斧鑿山裂，千尺蒼崖瀉飛雪。青天半夜玉簫寒，喚醒幽人弄明月。

甬上耆舊集

汪宗臣

宗臣字公輔，婺源人。咸淳二年，兩中亞選。入元不仕。有紫巖集。

稼穡

稼穡病多雨，蕪菁種待晴。壘空驚燕去，池淨櫬鷗明。野碓鳴秋杵，風簷響夜箏。山中涼意早，蚊蚋已無聲。

十一月宿於潛

蜂迷蜜甕尤絲香，蟻泛花甕碧玉漿。縣僻人稀寒日晚，古松樛翠出危牆。

以上新安文獻志

范師孔

師孔字學大，崇安人。咸淳丁卯恩薦，充講書。有畫餅臺。

高樓

高樓高登天，美人美如玉。美人坐高樓，更彈天上曲。飛聲落人間，誰不注耳目。安知妾此心，長恐晝夜促。莫羨高樓高，莫羨美女美。樓頭瞻明月，樓下看流水。月明圓易缺，水流去如駛。獨愛山中蘭，幽香抱枝死。

武夷山

幾與溪山絕世緣，重來猿鳥只依然。懸崖野瀑飄成雪，近午嵐霏暗盡天。水尙未疏須識禹，山如深入

定逢仙。洞中石鼎烹雲處，此夜還來借榻眠。以上四朝詩

鮑壽孫

壽孫字子壽，新安人。咸淳丁卯，領江東漕舉。

句

我無孤雁句，君有倚樓詩。一樽浮大白，千里策飛黃。但喜親庭健，何悲客路長。少日從游今

老矣，殘冬話別各淒然。方回桐江集

陳文龍

文龍字志忠，一字君實，興化軍人。咸淳四年，廷對第一。累遷參知政事。元兵至杭，文龍乞歸養。益王立于福州，復拜參知政事，充閩廣宣撫使，即興化軍開閩。元兵攻城，通判曹澄孫降，俘至杭，餓死。計開行朝，諡忠肅。

三柳軒雜識：陳文龍，度宗朝狀元也。德祐末，歸守本州。北兵入閩，不屈，生縛之，至杭，病卒于杭之貓兒橋巷。初，文龍入太學，累試不利。太學守土之神，岳侯也。一夕，夢神請交代，意必老死于太學，常悵悵不樂。既而赴廷對第一，仕宦日顯，前夢不復記矣。及守鄉州，又夢神通書，閱書前面曰：「交代。」後書年月至元，心甚慢之。未幾，國亡城陷，家殘身俘，至杭，幽于太學之側。

元兵俘至合沙詩寄仲子

斗壘孤危勢不支，書生守志定難移。自經溝瀆非吾事，臣死封疆是此時。須信梟囚堪覺鼓，未聞烈士

樹降旗。一門百指淪胥盡，唯有丹衷天地知。（興化府志）

李 瓘

瓘，興化軍人。咸淳戊辰進士。

挂冠詩

人言學古思入官，我謂學易而官難。平生透出夢覺關，本來面目只孺酸。吾親不俟若爲瓘，不如歸去臥林間。殿前三策罄忠肝，多謝皇恩天地寬。戲衫卸了白衣還，扁舟飛過子陵灘。前修亦有逋與搏，聖世許之俱寬閑。何物种放太厚顏，山鬼移文伐其姦。此行無復出閩山，休言息影谷之盤。今朝醺酒爵零壇，便向錢塘門挂冠。

古杭雜記詩集：度宗戊辰龍飛，狀元興化陳文龍、同郡李瓘、太學貫道齋上舍，係第三甲正奏名，于唱名之後，乞以本身官致仕，恩例盡以回贈父母。上書畢，辭先聖及三魁同舍，出錢唐門，脫綠袍，挂于門之上，泛舟而去。時三魁同舍皆送別，瓘有詩云云。

童 潮

潮，彭澤人。咸淳進士，官工部尙書。

小孤山

長江萬里來，一砥中流峙。巨浸沒根深，孤峯插漢起。倒回三峽流，獨據九江水。真是海門關，波濤險莫比。（西江詩話）

汪薦

薦一名韶，字東美，黟人。咸淳四年進士。

演雅

布穀不稼不穡，巧婦無褐無衣。提壺不可挹酒，絡緯匪來買絲。後村題跋

句

秋風駝臥棘，春雨燕巢林。

後村題跋：汪君此句，感時傷事，有足悲感。

胡次焱

次焱字濟鼎，號梅巖，婺源人。咸淳四年進士。授湖口縣主簿，改貴池縣尉。德祐乙亥，徵服

歸，教授鄉里以終。

媒問嫠

媒問嫠，汝何傷？汝爲國秀時，辛苦事蠶桑。閒瑟順爲正，婉婉禮自將。笥中有練裙，衣上無明璫。貧女古難嫁，賣犬辦資裝。中年得夫壻，憧憧拜姑嫜。肅容采蘋藻，洗手供羹湯。良人正少年，相期家道昌。良緣天所妒，夫壻奄云亡。自從夫壻亡，十年守空房。素帷代錦幃，苦席易牙牀。孤眠耿夜半，單立黯昏黃。瑩瑩影徘徊，缺缺情彷徨。皓月照孤衾，暴雨頽垣牆。獨寐誰呼喚，獨語誰交相。如凌空失翼，如涉川無梁。嫠來吾語汝，琴瑟貴更張。汝篋旣單薄，汝門復淒涼。汝寒何以衣，汝飢何以糧？

紡績終難給，春汲勞欲僵。死者不復起，生者宜自許。鄰有美丈夫，顒顒更昂昂。牛羊量用谷，金玉堆滿堂。畫梁青瑣闥，珠簾懸鈇廂。瑠戶金彈丸，寶鞍青絲韁。旌旗明晚霞，劍戟磨秋霜。奴隸厭綺紵，大貓棄餽餽。門下粲珠履，庭前沸笙簧。出則專城居，入則侍明光。一呼千夫諾，一指萬夫張。一笑生羽翼，一怒起鋒芒。吾慕者蹇脩，與汝解佩纓。以此窈窕婦，配彼叟僧郎。花樹戲蛺蝶，蓮浦浴鴛鴦。無煩賦藕花，且喜華枯楊。何妨鸞舞鏡，應被鳳求凰。人無百歲人，倏忽如風狂。莫將泡影身，徒置冰炭腸。死後留名節，身朽魂茫茫。生前受富貴，志得意洋洋。人生行樂爾，二者試裁量。蔬食不日給，孰與飫膏粱。荆釵不自謀，孰與雲霞裳。年滔滔不反，貌駸駸已蒼。敗棋須換局，作戲且逢場。文君慕相如，恢女喚江郎。有髮可重結，有耳何自戕。試問東夷子，何如聲伯孃？信書不如無，未必有共姜。鬼妻變人婦，毋作老死孀。

婆答媒

婆答媒，妾自憐。妾家貧如洗，妾貌妝不妍。中年方擇配，幸逢夫壻賢。藍橋凝仙會，紅葉開良緣。俯以奉箕帚，仰焉供豆籩。粵從定六禮，穩圖偕百年。渠疑有家願，倏罹中道捐。城崩哭呦呦，竹斑淚漣漣。空房照明月，幽隴淒寒煙。禽鳥喧墓門，魄降魂翩翩。蚺蜥滿窗戶，心結目涓涓。寮室昔華屋，埋玉今荒阡。恨不卽同穴，何忍續斷弦。翻思合卺初，參透老婆禪。如魚水游泳，如鴛鴦纏綿。奈何死生闊，泛泛水中船。綢繆爲夫婦，反覆如市廛。徒貽楊華醜，寧免柳絮顛。妾頗親筆硯，亦嘗閱簡編。女不踐二庭，婦不再移天。陶嬰寡鵠吟，衛妻孤燕篇。或刑耳自誓，或斷髮自全。或剗鼻偃蹇，或毀面

迤邐。吾足幸可刖，吾臂不可牽。卓卓節操立，表表鳳孤鶩。藐茲未亡人，有意奉周全。媒雖憫妾寡，媒適重妾愆。妾命春葉薄，妾心頑石堅。栖栖謀尺布，豈不羨園瓊。皇皇圖斗粟，豈不思葦簞。胼手任春汲，孰與奴婢千。鞠躬跼衡茅，孰與疏綺便。枯荄欣回春，缺月喜再圓。世誰不此樂，妾意獨不然。理義自有閑，物欲常無厭。三少穢難洗，五嫁醜莫鑄。浮榮瞥似電，遺臭流如川。媒言頗喋喋，媒意遽拳拳。之死矢靡他，斯言當真詮。文姬殊妖媚，易安亦嬋娟。失身再事人，形管無取焉。節義日以頽，文章何足詮。王母有差事，青鳥信頻傳。毋乃墮人慾，反以汙天仙。嫦娥豈不嫁，空抱老金蟾。所以廣寒宮，萬古清鑒懸。寧貧任勞澹，寧賤受磨研。寧凍如寒蠅，寧餓如飢鶩。終不以快樂，而易此憂煎。井底水不汲，山頭石不遷。再拜謝媒妁，歸來雙淚漣。什襲藏破鏡，他年會黃泉。

新安文獻志：右饗媒答問，宋鄉先生胡公次焱濟鼎之所作也。先生登宋咸淳四年第，授迪功郎，江州湖口縣主簿，以母老，改授池州貴池尉。德祐乙亥，天兵將至，池州都統制張林潛納款，請以城降。先生奉母亡歸，教授鄉里，或勸之仕，先生賦是詩以見意。大德十年，以壽終于家。後三十二年，復爲至元之三年，文自黃竹入郡，其孫師中適在郡中，出是詩俾文書之。嗚呼，讀柳子河間傳，知邪之得以敗正；讀先生是詩，知正之所以勝邪。天理之在人心，猶日月之在天也；可以缺蝕，而不可以喪其光明。若先生之心，孰得而缺蝕之哉？雖與日月爭光可也！鄉後學程文謹記。

梁棟

棟字隆吉，其先湘州人，後遷居鎮江。登咸淳四年進士。選寶應簿，調錢塘仁和尉。宋亡，弟

柱字中砥，入茅山從老氏學，棟往依焉。乙巳，無疾卒。有梁隆吉詩鈔。

四禽言

脫卻布袴，貧家能有幾尺布？寒機翦盡無可裁，可人不來廉叔度。脫卻布袴。不如歸去，錦官宮殿迷烟樹。天津橋上兩三聲，叫破中原無住處。不如歸去。

提葫蘆，今年酒賤頻頻沽。衆人皆醉我亦醉，哀哉誰問醒三閭？提葫蘆。

行不得也哥哥，湖南湖北秋水多。九疑山前叫虞舜，奈此乾坤無路何。行不得也哥哥。

山房隨筆云：寓意甚遠，諸作不及。

金陵廢宮

六代俄然又一唐，青山坐閱幾興亡。心知江左非王業，口說中原是帝鄉。落日有時登北固，春風吹夢過錢唐。荆墳檜宅依然在，留與烏衣話短長。

金陵三遷有感

憔悴城南短李紳，多情烏帽染黃塵。讀書不了平生事，閱世空存後死身。落日江山宜喚酒，西風天地正愁人。任他蜂蝶黃花老，明月園林是小春。

送李北山歸建康

人生無百年，胡爲在遠道。遊子歸故鄉，王孫怨芳草。有田歸去來，無田歸亦好。以上梁隆吉詩鈔

登大茅峯

杖藜絕頂窮追尋，青山世路爭嶠峩。碧雲遮斷天外眼，春風吹老人間心。大君上天寶劍化，小龍入海明珠沈。無人更守元帝鼎，有客欲問秦皇金。巔崖誰念受辛苦，古洞未易潛幽深。神光不破幽暗惱，山鬼空作灘聲吟。我來俯仰一慷慨，山川良昔人民今。安得長松撐日月，華陽世界收層陰。長嘯一聲下山去，草木爲我留清音。〔正〕金陵漸結

〔至〕正直記遺編：宋末士人梁隆吉，有詩名，以其弟中砥柱爲黃冠，師三茅山，嘗往還。一日，登大茅峯，題壁賦長句。有黃冠訴于句容縣，以爲誣謗朝廷，行省聞之，都省收梁于獄，禮部免罪放還。嘗觀其詩集云云，其意亦可悲矣。

哀思陵

〔德〕祐元年，元兵攻常州。城破，知州事姚嵩、統制王安節等死之。

荆溪水腥泊船早，落日無人行古道。鬪餓有眼不識羞，東風吹出青青草。荒基猶認是人家，敗柵曾將當城堡。當時壓境兵百萬，不脫鞬尖堪蹴倒。短兵相接逾四旬，毒手尊拳日攻討。內儲外援兩消沈，一縷人心堅自保。孤臣守土輕性命，赤子效死塗肝腦。朝廷有爵媿降附，幽壤無恩澤枯槁。願饒司命錄英雄，收拾忠魂昇穹昊。〔思陵忠義錄〕

送存書記

一聲兩聲松子落，一片兩片楓葉飛。夕陽在山新月上，道人相伴一僧歸。〔清河書畫坊〕

句

千枝守紅死，一點反魂啼。〔雪中見山茶〕

癡兒嬌勿啼，不久當澄霽。〔暴雨〕

家貧忽暴富，菜種一十七。

癡兒不解事，問我何從得？於義苟有違，吾寧飢不食。

賦蔬 至正直記遺編

莫 崙

崙字子山，號兩山，江都人，寓家丹徒。咸淳四年進士。入元不仕。

癸辛雜識：梁棟隆吉，鎮江人，登第授尉，與莫子山甚稔。一日，有客訪子山，留飲，偶不及棟，棟憶之，遂告子山作詩有譏訕語。官捕子山入獄，久之得脫而歸，未幾病死。余挽之詩云：「秦邸獄成杯酒裏，烏臺禍起一詩間。」紀其實也。

湛困靜語：莫子山暇日山行，過一寺，頗有泉石之勝，因誦唐人絕句以快喜之云：「終日昏昏醉夢間，忽聞春盡強登山。因過竹院逢僧話，又得浮生半日閑。」及叩其主僧，庸僧也，與語略不相入，屢欲舍去。僧意以爲檀施，苛留作午供，鬱鬱久之，殆不自堪，因索筆，以前語錯綜其詞，書于壁曰：「又得浮生半日閑，忽聞春盡強登山。因過竹院逢僧話，終日昏昏醉夢間。」

傷丁氏故基題一絕于太虛堂

疎雨斑斑灑葉舟，前山喚客作清游。芳華消歇春歸後，野草荒田一片愁。

山房隨筆

張鎮孫

鎮孫字鼎卿，南海人。咸淳七年，進士第一。通判婺州。

謝恩詩

當宁宵衣務得賢，草茅何足副詳延。天人要語垂清問，仁敬陳言上奏篇。媿乏謀猷裨乙覽，忽驚姓字

首臚傳。乾坤大德知難報，誓秉孤忠鐵石堅。

雙槐歲鈔

林一龍

一龍字景雲，永嘉人。咸淳辛未進士。官至史館檢閱。時稱爲石室先生。

山中夜坐

寒灘遠嘶月，遺響到巖壁。悠悠千古心，悄悄一卷易。燈微夜氣分，星冷山露滴。危坐獨何爲，人間睡方黑。

十四夜觀月張氏樓

只隔中秋一夕間，蟾光應未少清寒。時人不會盈虛意，不到團圓不肯看。

以上東甌詩集

厲元吉

元吉字无咎，號牛村，餘姚人。咸淳辛未進士，仕爲烏程尉。德祐末，歸隱從山。至元中，訪求前宋故臣，元吉遜跡湖海，白首始歸。有牛村集。

黃宗羲云：牛村出尉烏程，謝疊山送之詩云：十二街頭三尺雪，駿馬健行如跋鼉。生懷故人厲牛村，拂袖前行何勇決。疊山居士強欲吟，凍筆如椎硯欲裂。京國青衫十載交，欲言不言情哽咽。願君勿作繞指柔，願君勿作在鐵鑊。甘雨幽遐冤草薶，清風宇宙貪泉竭。循良寧困聖明時，玉燭光華待調鑾。疊山詩文，零落無幾，余從厲氏子孫，見其墨跡如新。

雨過